

東
華
續
錄

東華續錄

嘉慶三十八

臣王先謙敬編

臣周倫恭校

秋七月己丑朔以彭希濂爲內閣學士

由光祿寺卿遷

○庚寅諭宗室普

庭准其減等令回至盛京在該處移居宗室公所酌給房屋居住

嗣後緣事發遣宗室其由盛京釋回者即令回京由吉林黑龍江

釋回者即令在盛京居住著爲令○調李長森爲江甯布政使陳

桂生爲福建布政使○辛卯諭朕此次恭謁東陵著派肅親王

永錫大學士曹振鏞吏部尙書英和工部尙書蘇楞額留京辦事

向來恭遇謁陵因往還時日無多留京王大臣例不在內值宿

看管合符自此次爲始凡遇謁陵巡幸之期派出留京王大臣

俱一體恭請合符輪流直宿每日卯時四人公同進內一人留直

餘三人申初方准散歸此次英和以吏部尚書兼管步軍統領事務較繁著無庸直宿每日午時先出禁城所有留京王大臣出入時刻及輪應值宿日期著派阿哥等公同稽查如有遲誤曠班者具摺附報參奏不可稍遲時刻其餘紫禁城內各該班王大臣等著留京王大臣每日開列名單呈送阿哥等抽查或將直班之人傳至乾清門面見或派諸達等赴各直班處所查看倘有遲誤曠班及未見接班之人先散去者亦著阿哥等具摺附報參奏○以李宗瀚爲左副都御史

由宗人府
府丞遷

○乙未諭上年山東定陶曹縣

匪徒滋事同興本有失察之咎及帶兵前赴曹州又復畏葸遷延全賴劉清奮勇當先督兵剿捕得以迅速成功朕因彼時東境先就肅清加恩寬其罪譴仍留山東巡撫之任乃本年六月金鄉縣又有匪徒聚眾逞兇之事同興於六月十五日已接據稟報隱匿

不奏半月之久臬司程國仁係漢人到任未久尙知稟請親往同興身任封疆並不親赴及朕已聞知特派章煦那彥寶前往查辦同興於七月初二日始專差齎招補奏以圖掩飾前非似此因循玩誤斷難再事姑容同興著交部嚴加議處山東巡撫著章煦以尙書署理食一品俸支食巡撫養廉同興卽派員將印信送交章煦接受自行摘去翎頂來京聽候部議○丁酉諭禮部奏議駁御史黃中傑條陳優貢考試事例一招各省優生三年舉報一次與拔貢十二年舉行一次者年數懸殊如一體加以廷試引見錄用實於體制未協該御史所奏不可行至該部奏稱嗣後優貢生免其來京朝考以示體恤等語所奏亦非各省優生由學政會同督撫保題升入太學朝考後始准作貢生斯合貢於王廷之義若停止朝考殊覺名實不符禮部堂官輕改舊章著傳旨申飭其優貢

朝考仍照舊例行○庚子諭軍機大臣等那彥成奏酌派文武員弁稽查變輅經由地方一摺朕每歲謁陵係常行典禮秋獮前期駐蹕熱河變輅所經皆在近畿數百里之內如同戶闔一切扈從兵衛悉有常儀上年京城內雖有逆匪滋事之案而蹕路所過一塵不驚原無庸過於設備若如那彥成所奏令站道弁兵俱各手持槍矛紛紛林立豈不駭人觀瞻所有直隸官兵隨扈章程前經軍機大臣等詳悉會議奏准頒行該督惟當祇恪遵守其沿途站道弁兵著俱循照向例佩帶弓箭腰刀執持儀棍其烏槍長矛二項斷不准用如有私自攜帶者屆時立行拏究將該管管員治罪並將那彥成懲處不貸○增設河南內黃縣主簿駐楚旺鎮○癸卯蔣繼勳緣事降調以康紹鏞爲安徽布政使由大理寺少卿遷○戊申諭朕因大學士勒保目疾未愈屢於召見伊子英綬時面加詢

問昨據英綬奏稱伊父近日延請祝由科醫生看視其治法先用
口在太陽穴吮出毒氣隨後再畫符念呪可望有效等語朕以符
呪之事近於邪術因命軍機大臣傳諭英綬令其將延醫緣由據
實具奏本日據英綬摺奏該醫生張泳甯向來俱係按法治病實
無畫符念呪之事並非祝由科亦無傳徒惑眾等情此次爲伊父
勒保吮治三次無效已不令醫治等語張泳甯用符呪治病情由
朕先未聞知英綬前日面奏甚明乃於傳旨查訊時槩爲推卸前
後奏對情詞歧異矢口亂言英綬著交部議處醫生張泳甯著交
軍機大臣會同刑部審訊定擬具奏○辛亥諭劉清上年在山東
帶兵剿賊民情甚爲愛戴雲南布政使一缺與伊不甚相宜著以
二品頂帶仍留山東鹽運使之任雲南布政使員缺著趙宜禧補
授○調陳預爲山東巡撫以顏檢爲浙江巡撫

由山東鹽運使遷

○調和

舜武爲廣東按察使以韓克均爲河南按察使

由浙江溫處道遷

○壬子

諭英綬前在朕前奏稱伊父勒保延請祝由科醫生吮治目病兼有符呪等術及朕命軍機大臣傳訊英綬覆奏又稱醫生張泳甯向係按法治病並非祝由科等語張泳甯吸氣吮瘡術涉異端必應驅逐遠方以正首善風俗此犯雖非由英綬延致但伊奏對前後兩歧實有應得之咎部議降三級調用念其兼任護軍統領此次該營官兵內有中五箭者四人其平日訓練尙屬認真請敘應加一級可抵去降一級仍有應得降二級調用處分英綬由侍衛出身於武職尙堪勝任著加恩改爲降二級留任所有鑲黃旗護軍統領正黃旗滿洲副都統左翼總兵俱著照舊管理其於部務不能諳習工部侍郎著卽行開缺○以熙昌爲工部右侍郎蘇紳阿爲理藩院右侍郎

由內閣學士遷

○調韓克均爲雲南按察使伊湯安

爲河南按察使○癸丑諭朕聞山東省吏治廢弛巡撫藩臬怠玩因循毫無整頓先後降旨罷黜復派章煦那彥寶前往確查茲據章煦等奏稱該省吏治廢弛地方凋敝官民交怨訟獄繁興倉庫空虛人情刁悍詳加察訪眾口一詞同興身任封圻負恩溺職惟藩司朱錫爵之言是聽首府疑圖聲名狼藉一味姑容不加參劾朱錫爵素好華侈綜理財賦漫不經心支發軍需毫無頭緒並時令九如堂戲班在署演唱等語同興朱錫爵以撫藩大員如此廢弛地方厥咎甚重同興昨已照部議革職朱錫爵前降補郎中不足蔽辜亦著革職○丁巳以楊護爲江蘇布政使廣慶爲浙江按察使由雲南糧道遷○調廣格爲江蘇按察使楊懋恬爲山西按察使○內閣學士常亮以讀本錯誤降六品贊禮郎

八月辛酉諭汪志伊奏紹興協副將吉耶阿年力正強曉暢營務

前因箭未中靶奏請勒限半年再考今考驗得該副將馬步箭中靶三枝仍請留任等語所奏甚屬非是副將有分間之寄全在整飭營務訓練官兵方爲稱職至箭靶之中否乃一日之短長豈能以此定其優劣如果該副將平日於營務認真經理訓練有方卽考驗時偶爾箭不中靶原可寬恕倘因循怠玩諸務廢弛或有別項劣蹟雖試射合格豈能不加以參劾吉耶阿旣曉暢營務自應仍留副將之任汪志伊前後兩奏均覺多事著傳旨申飭嗣後該督於所屬營伍惟當實心簡覈秉公勸懲不可舍本逐末也○諭御史蔡炯奏請禁粵民製造竹銃以弭兇關一招所奏非是直省鞠審命案分別謀故鬪殺其致命之傷則有火器金刃他物手足之不同讞獄時但進情援律定擬罪名其殺人器具不能強爲厲禁若謂竹銃可以殺人禁民製造凡民間日用金木器物何一不

可戕命豈得槩登例禁其手足傷人者又將何法以治之耶况增一禁令適爲胥役增一訛索賄縱之門於戢暴懲兇毫無裨益至該御史所稱竹銃斃命之案招冊內不得聲敘希圖嚇退等詞火器殺人刑部均擬情實秋審時亦必予勾其希圖嚇退乃案情所時有並不以此加之實有招冊據情聲敘豈可槩事刪除該御史此奏所謂因噎廢食著無庸議○癸亥免河南被賊滋擾之滑縣等二縣新舊額賦○甲子 上御經筵○諭軍機大臣等初彭齡奏查辦虧空嚴禁密奏之弊一摺所奏甚是可謂實心任事能任勞任怨矣各省倉庫查有虧缺原應隨時懲辦前因積弊已久見任官大半非原屬之人是以令清查確實截止數目以期分限彌補乃自有清查以來各該督撫不但不能依限勒令彌補且不免有續虧每藉口於原報之數不實不盡以致每隔數年續查一次

其數倍多於前此非積虧而何初彭齡所稱名爲密摺陳情實則
通同舞弊此二語確盡情事卽如江蘇省嘉慶六年岳起查奏時
各屬虧缺銀三十餘萬兩若能分年彌補迄今已越十年每年約
補三四萬金早已據報全完乃張師誠任內續查已增至七十餘
萬兩至慶保任內續查竟增至二百二十萬餘兩江甯藩司又報
出九十六萬餘兩江蘇一省共虧銀三百十八萬餘兩較岳起初
報之數多至十餘倍試思自嘉慶六年以後並無南巡大差亦無
諭令豫備巡幸之事豈東南一路有兵差徵調可以藉口乎又豈
在京諸大臣中有似從前和珅貪婪者致該省督撫傾貲餽送乎
如果有之卽據實陳奏毋稍隱諱計惟南河屢舉大工及災歉賑
恤數年之間所費甚鉅然皆出自國家左藏共撥銀數千萬兩何
嘗絲毫累及地方乃該省歷次清查虧空有增無減若再姑息不

辦何以儆官邪而慎國帑惟此時若卽明降諭旨按律查辦不特
罹於重辟者人數過多且亦於帑項無益各州縣雖同一虧空其
實在情形亦有不同卽銀穀各數亦有差等一經徹底查辦俱不
難水落石出百齡初彭齡皆係實心任事之員著卽會同查辦將
歷任虧空之員各就該員名下查明實據此內貪黷營私損國課
以肥私囊者指明參奏拏問寔之重典仍查鈔家產作抵等而下
之何等者應革職監追何等者尙可暫行留任勒限追賠分別情
罪重輕酌擬章程開單具奏候旨遵行俟江蘇一省辦定章程再
明降諭旨令凡有虧空省分俱倣照辦理以期國帑清釐咸知儆
懼剔除積弊再張師誠前因親病告假見將屆兩月其父母病證
是否已愈未見具摺銷假江省距伊原籍甚近著百齡初彭齡就
近察訪遇便摺奏○以安徽合肥等四十州縣水旱災撥藩庫銀

二十萬兩採買米穀平糶○乙丑諭向例武殿試御紫光閣第一日閱視中式武舉由西苑門進內趨走不無擁擠本科武殿試朕於十月十八日御紫光閣閱視馬步射十九日在景運門外御箭亭閱視弓石回宮後帶領引見二十日升殿傳臚著爲令○丁卯諭凡祭祀齋戒期內適遇忌辰其應川服色總以祭祀爲重南郊大祀前一日如適遇忌辰恭閱祝版時朕御龍袍龍褂執事人員均穿蟒袍補服其餘大祀中祀前一日適遇忌辰恭閱祝版時朕御龍褂執事人員均穿補服以昭祇肅著爲令○命皇次子智親王釋奠先師孔子○戊辰調成格爲工部右侍郎轉那彥寶爲刑部左侍郎調熙昌爲刑部右侍郎_{由工部右調}○辛未大學士勒保再以疾乞致仕允之予食伯爵全俸命托津爲東閣大學士管理戶部以明亮爲兵部尙書協辦大學士調瑚圖禮爲戶部

尙書以伊冲阿爲左都御史

由都統遷

○甲戌論據那彥成奏請將查

拏逆犯畏蕙遷延之遊擊請旨革職一摺那彥成自抵直隸總督

任後於飭拏要犯未經緝獲一名此次訪有祝現蹤迹派遊擊圖

勒畢善帶同跟蹤前往查拏該遊擊遷延觀望以致逆犯聞風他

竄那彥成派委不慎咎無可辭乃僅參奏圖勒畢善並不自請議

處甚屬非是圖勒畢善著革職來京俟逆犯就獲後如訊明實係

祝現再治其罪若僅係次要之犯則革職已足蔽辜免其治罪那

彥成著革去雙眼花翎仍帶單眼花翎並交部議處將來祝現等

六犯悉數拏獲內由直隸員弁拏獲一二人尙可加恩賞還那彥

成雙眼花翎若無直隸員弁拏獲者不能邀恩賞還也○乙亥胡

長齡以疾免以戴均元爲禮部尙書茹棻爲左都御史

由工部左侍郎遷

○丙子以王以銜爲工部左侍郎

由內閣學士遷

○戊寅 上啓鑾謁

東陵○免經過地方額賦十分之三○庚辰諭軍機大臣等據伯麟等奏睢工見辦堵築事宜請共繳養廉銀一萬五千兩解往備用等語封疆大吏祿入豐厚值國家辦工需費之時情殷捐助亦屬分所當然但睢工距雲南幾及萬里該處工費前據吳璥等通盤籌計約用銀三百八十萬兩業經如數籌撥解往應用該督撫所繳養廉一萬五千兩長途運送殊於大工無補伯麟孫玉庭受朕厚恩畀以邊陲重寄惟在將地方事務經理得宜使政肅民安邊疆甯謐通省倉庫錢糧毫無欠缺卽所以紓忱報效再該省銅鹽二事亦經費之大端伊等盡心籌辦能使京省鼓鑄無缺鹽井額課無虧亦卽於國帑有裨又何在區區呈繳乎所有伯麟孫玉庭請繳廉助工之處著不准行設該省地方閒有水早有資撫恤或銅鹽諸務有應需調劑之處或督撫量力捐辦可以節省帑項

則伊等義切急公是亦在所不禁也○辛巳 上謁 昭西陵

孝陵 孝東陵 景陵 裕陵回鑾○召素納來京以錢臻爲直

隸布政使李鑾宣爲直隸按察使由通永道遷○甲申 上還京師○

丁亥以曹師會爲內閣學士山左副都御史遷○以何銑爲太僕寺卿瑞

齡爲陝西布政使訥福爲福建按察使由山西冀甯道遷

九月戊子朔諭百齡初彭齡參奏藩司不將新虧之弊實力剔除

請先行革去頂帶一摺藩司專司錢穀杜絕那移先須將本年應

解之款依限催提見當清釐庫款之時江甯江蘇兩藩司於本年

上忙銀兩承催不力又不據實揭參實屬玩縱陳桂生常格俱著

革職留於該省戴罪督催如能如數完解該督撫查明另行施恩

賞給差使儻逾限不完卽奏請嚴議分別著賠將經徵玩誤各員

一併嚴參治罪○禁直省督撫以下官延屬員襄理幕務○調瑞

齡爲福建布政使以楊懋恬爲陝西布政使調訥福爲山西按察

使以習振翎爲福建按察使

由汀漳龍道遷

○辛卯以廣泰慶明俱爲內

閣學士

廣泰由左副都御史慶明由太常寺卿遷

○癸巳諭李鴻賓奏微山湖水收復

舊規一摺近年微湖收蓄短絀皆因引渠淤塞不能進水又兼各

閘啓閉失宜以致耗洩過多不敷濟運朕特授李鴻賓爲河東副

總河督辦收蓄事宜茲據奏稱測量微湖誌椿已收至一丈一尺

九寸二分較之定誌僅短八分見在來源甚旺計可於收符舊制

外更有贏餘其蜀山南旺昭陽等湖均已儲蓄充盈辦理甚屬認

真李鴻賓係嘉慶六年進士由翰林改擢科道資格尙淺經朕簡

用副總河後能盡心妥辦不負委任著加恩賞給二品頂帶以示

嘉獎○加托津太子太保○訓景安爲戶部尙書瑚圖禮爲禮部

尙書○丙申以南河秋汛安瀾予黎世序二品頂帶○癸卯諭軍

機大臣等據御史陳鍾麟奏本年江蘇省被旱歉收亟需剴劑聞該省州縣官因藉口設措虧項於民情災務未能兼顧見際顆粒如珠儻徵收漕糧借彌補名目多方勒指則鄉曲窮黎更形支絀請飭令該督撫悉心妥辦毋得顧此失彼等語江蘇倉庫虧缺皆緣貪官污吏恣意侵欺飽其慾壑平素視國帑爲己私指官虧爲民欠究之實在致虧之由與民何涉實堪切齒痛恨斷勿令其倖免此時虧空惟當將各該員名下所虧實數按款徹查指明參辦或籍沒或追賠或責限彌補一一罄其私貲償補足數辦理方爲允協若州縣因籌補舊虧藉徵收爲設措則是官侵吏蝕其累悉歸於民甚或不肖之徒轉復藉此漁利公項未清私橐又飽其腴民伊於胡底江蘇見當荒旱之年米糧缺少正須盡心撫字豈可因官員之不肖苦累吾民此時果有實欠在民毫無影射伊等查

明據實陳奏朕仍卽酌量加恩當與官員舊虧分別辦理可也張師誠昨已起身赴任初彭齡於交篆後著作爲欽差暫留江蘇仍會同該督撫將此事詳悉妥辦俟辦定章程再來京供職其該御史所奏招徠商販勿過於抑勒市價俾令踊躍運販之處並著該督撫酌量情形隨宜妥辦○以景祿爲左副都御史

由通政使遷

○甲

晨諭軍機大臣等本日章煦等奏交卸撫篆各摺陳預接受撫篆後所有地方刑名錢穀事務自應由該撫專辦章煦著以欽差暫留該省此時逆犯未獲緝拏緊要著章煦會同陳預密飭嚴拏勿任久匿違颺是爲至要又東省各州縣倉庫虧空一事伊二人應卽督同藩司慶放將該州縣所虧實數及致虧之由逐一究出如同興朱錫爵二人及凝圖等有染指得贓情事當不避嫌怨指名參奏如同興等並無染指亦應將州縣內侵蝕肥己者據實嚴參

勿使倖免其餘分別覈辦此等貪官污吏悖入已久或籍沒或追賠或勒限彌補惟當一一罄其私貨償補足數不得任其以民欠爲詞如實有未完民欠伊二人確切查明並無影射奏明後方可酌量施恩章煦俟將此事辦定章程再行來京供職○王子調普恭爲倉場侍郎轉禮恩爲兵部左侍郎以恩甫爲兵部右侍郎由內閣學士遷○癸丑命河東副總河歲支養廉銀四千兩○以陸以莊爲左副都御史由宗人府府丞遷○丙辰諭陳預奏東省藩庫收支款項應令按旬詳報一摺東省藩庫支發各款向不詳明巡撫止有月報而所報又係籠統開載以致節年支發彌補各款膠轕不清殊非慎重出納之道著照該撫所請嗣後飭令藩司將收支銀兩按旬詳報巡撫備案如非常例應支及本款無項而借動別款者俱令隨時詳明巡撫俟數定方准支放庶款項互有鉤稽免致日久弊

混

冬十月甲子召伊湯安來京以琦善爲河南按察使

由通政使司副使遷

○

乙丑以伊冲阿爲烏里雅蘇台將軍慶溥爲左都御史

由烏里雅蘇台將軍

遷

○常福緣事解任調成格爲戶部右侍郎穆克登額爲工部右

侍郎轉寶興爲禮部左侍郎以穆彰阿爲禮部右侍郎

由內閣學士遷

○

丁卯以安徽廬州鳳陽等府水災撥藩庫銀一百一十五萬兩備

賑○己巳論阮元奏拏獲逆案主謀夥要各犯先行審明辦理一

摺此案逆匪胡秉輝買得殘書一本內有陣圖及悖逆俚語卽向

逆夥邱添澤楊易盧勝輝誇稱解得書內陣圖如得有爲首起事

之人便可圖取富貴楊易隨以朱毛俚可以假託前明後裔朱毛

俚自認不疑遂共赴積善禪林同謀爲逆取逆書內俚詞稱爲後

明晏朝年號僞封胡秉輝等官職展轉糾約入夥給與僞札該逆

等踐土食毛膽敢性同梟獍自外生成實屬罪大惡極阮元到任未久卽能飭屬於地方編查保甲嚴密查辦遂將鉅案立時發覺辦理迅速實屬可嘉阮元著賞加太子少保銜並賞戴花翎卽發去花翎一支白玉翎管一箇並賞給大荷包一對小荷包四箇各省承平日久奸慝潛生全在地方大吏飭屬認真查察除莠卽所以安良上年林清一案其倡爲逆謀已經數歲如直隸總督順天府尹等於該逆等未經舉事之先早能如此次之訪聞捕獲人數不多豈不甚易乃經歷年所如聾如瞶及至釀成巨逆毗連三省罹於刑誅兵革者爲禍甚烈實皆該大吏等因循怠玩貽誤所致各該督撫具有天良能不引以爲鑒耶案內胡秉輝等十七名業已分別凌遲斬決辦理程麟祥等三十五犯定擬發遣爲奴尙屬輕縱著改爲絞監候入於明年秋審情實該撫卽將各犯分交各

府監禁不准與外人交接通信如稍不安靜卽行正法至朱毛俚一犯尤爲此案罪魁必應卽時拏獲處以極刑以快人心而伸國法著兩江湖廣閩浙各總督江西福建浙江江蘇安徽湖北湖南各巡撫一體飭屬查拏如於何省拏獲卽由該督撫訊取供詞由四百里具奏一面卽於該省正法各該督撫皆當視朱毛俚一犯在伊境內藏匿飭屬認真嚴密訪拏務在必獲不得以見在已飭鄰省查拏彼此恃有委卸稍爲鬆勁如阮元能於江西境內拏獲仍當給予議敘其餘曾化龍等十九犯拏獲後如訊係倡謀推奉朱毛俚爲首之犯卽凌遲處死如得受僞封官職並糾約人眾者卽斬立決儻明知叛情聽從得受憑票並未受職糾人者擬絞監候入於明年秋審情實將此通諭知之○庚午以那丹珠常英破徵俱爲內閣學士

那丹珠由詹事常英由大理寺卿敬徵由副都統遷

○丁丑賜丁殿甯等

四十八人武進士及第出身有差○丙戌以慶格爲貴州布政使

毓岱爲江蘇按察使

由蘇徐道遷

十一月壬辰徵瑞緣事革職轉穆克登額爲工部左侍郎調潤祥

爲工部右侍郎以德文爲盛京戶部侍郎

由刑部員外郎遷

○壬寅調潤

祥爲倉場侍郎普恭爲工部右侍郎○以陳若霖爲四川布政使

曹六興爲四川按察使

由建昌道遷

○丁未命英和暫在軍機處行走

○戊申諭軍機大臣等御史陶樹奏紅鬍匪徒日熾敬陳緝捕事

宜一摺河南南汝光一帶以及安徽潁毫等處向多紅鬍匪徒屢

經降旨飭緝總未斂戰今據該御史奏稱近來日聚日多橫行益

甚每一股謂之一捻子小捻子數人數十大捻子一二百人

不

等成羣結隊公肆搶劫或奪人貲財或搶人妻女甚至空人目睛

且有頭目指揮河南之息縣光山正陽羅山汝陽項城爲尤甚其

在逃未獲之王妮子卽屬頭目而地方官捏稱爲從其在安徽者
有李東山馬大振二人最爲出名見在藏匿阜陽縣境內每人手
下約有千人州縣顧預不辦等語除奏安良爲地方官專責若畏
難不辦日久養癰益滋隱患該御史摺內指稱人名地方懸鑿有
據其言必非無因且該匪徒夥黨約有千人則在逃未獲之逆犯
祝現劉成章等難保不投入其中冀延殘喘著方受騰胡克家各
遴選妥員在河南息縣等處安省阜陽境內將王妮子李東山馬
大振三犯按名捕獲審明嚴辦並密訪各逆犯有無潛迹在內者
設法查拏毋稍疏縱再本年安省賴亳一帶收成歉薄饑民甚多
胡克家尤當密諭妥員持以鎮靜務須不動聲色將指拏匪徒逆
犯嚴密緝捕首犯就獲則其餘夥黨自必畏懼解散不可張皇海
捕致令夥眾驚擾激成事端此爲至要○己酉命開墾伊犁養息

牧廠荒地○癸丑命開墾吉林所屬拉林東南夾信溝荒地○乙卯諭軍機大臣等朕聞本年八九月間有英吉利護貨兵船違例闖入虎門又有英吉利夷人呵噓噍前於該國入貢時曾隨入京師年幼狡黠回國時將沿途山川形勢俱一一繪成圖冊到粵後又不回本國留住澳門已二十年通曉漢語定例澳門所住夷人不准進省呵噓噍在粵既久夷人來粵者大率聽其教誘日久恐致滋生事端著蔣攸銑等查明呵噓噍有無教唆勾通款蹟如查有實據或遷徙安置奏明妥辦○丙辰李長森以疾免調慶格爲江蘇布政使以史致光爲貴州布政使張暉古爲貴州按察使由州道遷

十二月戊午諭蔣攸銑奏請生監考試槩令默寫 聖諭廣訓以端士習而厚民風一摺向來直省各學政歲科考試取進童生預

試時定有敬謹默寫 聖諭廣訓之條誠以士爲民倡果能平時服誦相與宣講內而砥礪躬行外而化導鄉俗自見薰德善良風氣日臻淳厚其直省各學監生不由童試素未誦習而生員於取進後亦日久不復循誦該生監等身列膠庠爲齊民之表率尤應令其修德懷刑導民先路著禮部通行直省各學政嗣後歲科兩試並貢監生錄科考遺均一體敬謹默寫 聖諭廣訓一二百字其不能默寫者按其文藝遞降等第及斥置不錄庶生監等勤加肄習共相漸摩俾鄉曲小民咸知觀感用副朕化民成俗之意○諭軍機大臣等蔣攸銛等奏密陳夷商貿易情形及酌籌整飭洋行事宜一摺所奏俱是粵省地方瀕海向准各國夷船前來貿易該夷商遠涉重洋懋遷有無資天朝體恤之恩然懷柔之中仍應隱寓防閑之意近來英吉利國護貨兵船不遵定制停泊外洋竟

敢擊至虎門其說詳情形甚爲叵測蔣攸銘示以兵威派員詰責該大班始遞稟謝罪此後不可不嚴申禁令該夷船所販貨物全藉內地銷售如呢羽鐘表等物中華儘可不需而茶葉土絲在彼國斷不可少儻一經停止貿易則其生計立窮書云不寶遠物則遠人格該督等當深明此意謹守定制內固藩籬不可使外夷輕視嗣後所有各國護貨兵船仍遵舊制不許駛近內洋貨船出口亦不許逗留如敢闖入禁地卽嚴加驅逐儻敢抗拒卽行施放槍礮懾以兵威使知畏懼所有該督等請嚴禁民人私爲夷人服役及洋行不得搭蓋夷式房屋鋪戶不得用夷字店號及清查商欠不得濫保身家淡薄之人承充洋商並不准內地民人私往夷館之處均照所議行○以浙江杭州嘉興湖州三府旱災命濬西湖以工代賑○己未以江蘇吳縣等三縣旱災撥附近倉米六千石

備賑○辛酉瑚因禮卒以穆克登領爲禮部尙書景祿爲工部左

侍郎

由左副都御史遷

○癸亥諭前據鮑桂星條奏武英殿刊刻校勘事

宜一摺當經降旨交軍機大臣議奏又另片參奏提調劉榮黼等聲名平常卽派總理事務王大臣及武英殿總裁會同秉公查奏及蘇恩等奏上時朕召見常福據奏伊等在武英殿查詢時提調劉榮黼對眾指稱鮑桂星因熙昌校勘修改恐致遲延會言熙總裁所校不過偏旁點畫可以將就並言近日有旨旗人多靠不住此時督撫多用漢人等語當交軍機大臣傳詢鮑桂星卽據認有此語係本年秋間問自周兆基並稱在部與滿員共事見多有徇私背公者適是日周兆基自盛京差回遂著傳詢周兆基兼令鮑桂星將徇私背公係何人何事據實指出隨據周兆基登覆伊於召見時並未奉有此諭旨亦未與鮑桂星言及見在已據鮑桂星

自認彷彿記憶是日赴園太早假寐初醒周兆基所言聽聞不真其鮑桂星所指熙昌屬託武英殿供事又託將吉林開採煤窯議准及慶溥託伊工程委員等款據熙昌登覆實無請託供事之事卽鮑桂星亦不能指出所託供事姓名其屬託吉林煤窯一節據熙昌覆稱但言吉林請開煤窯係屬好事並非託其議准慶溥登覆止認曾在朝房間過鮑桂星所奏何事鮑桂星答以具奏董率工程亦未屬託委員以上各情節如果鮑桂星存心公正則周兆基以召對時詢旨失口向人宣露鮑桂星應立時參奏朕必將伊加以褒獎乃以彷彿無稽之言輒向劉榮黼轉述其誣妄之罪尙何所辭卽慶溥熙昌等果有屬託情弊鮑桂星亦應將所託何人何事原交名條據實參奏乃因口舌爭競牽連率指一經研究全無證據豈能以此坐周兆基等之罪鮑桂星任性乖張妄言亂政

著交部嚴加議處慶溥於鮑桂星不同部院其所奏何事本不應
與聞乃率行詢問以致鮑桂星疑有屬託慶溥著交部察議周兆
基熙昌均無庸議尋議上得旨鮑桂星指訐慶溥熙昌等屬託公
事一無證據其咎猶小至其所述朕輕滿洲重漢人之語此則妄
言亂政之大者朕統御寰區滿洲漢人一視同仁從無偏愛偏憎
於其間國家設官定制如東三省及新疆各城並各省駐防文武
大員皆專用滿洲此因地制宜之道有漢人所必不能勝任者若
直省督撫滿漢開用因材器使惟視其人之賢否何嘗有畸重畸
輕之見乎鮑桂星以私意揣度爲此無稽之言謬妄已極著卽照
部議革職不准回籍令其在京閉門思過仍責成五城御史不時
稽察如私著詩文有怨望誹謗之詞卽行嚴參從重治罪不貸○
乙丑以王鼎爲工部右侍郎

由內閣學士遷

○壬申以湯金釗爲內閣學

士由詹

○甲戌以永祚爲左副都御史

由通政使遷

○庚辰諭軍機大

臣等托津等奏查辦初彭齡參奏百齡張師誠大槩情形一摺此

案初彭齡原參百齡得受泰壩永豐兩壩公費一款見查得此項

公費從前奏明有案自乾隆五十三年以來歷任總督均提充本

衙門公用有案卷可查並非始自百齡不得謂之需索其所稱巡

撫衙門提解海關揚關兩處公費並張師誠未經到任先行提用

一節據查明張師誠於此項銀兩並未提用見在托津等飭調中

軍馬進並提查案卷自可得其原委此內有情節最關緊要必須

徹底查明者係初彭齡所稱百齡於兩壩公費外尙有縣丞傅祖

緒吏目胡開聖檢校陳青照等派管兩壩之時百齡得受銀二萬

四千兩均係馮潮過付一款又張師誠向劉雲查問關稅致劉雲

心疑復索送銀二千兩一款百齡張師誠身任督撫如果婪索賊

私必當嚴辦示懲但必須得有確據方能治伊二人以篋篋不飭之罪著托津等向初彭齡詢明伊所稱百齡張師誠收受此兩項銀兩究係何人告知有何人堪作證據此時贓物何在卽業已用去亦有實在下落伊旣稱閩省皆知不難指出向伊告知之人姓名傳案質證果經查訊屬實卽將百齡張師誠據實嚴參治罪勿稍瞻徇設查究此二款初彭齡不能指出實據則百齡張師誠均係一二品大員亦不能以毫無指實之言妄行參劾汚其名節托津等卽將初彭齡陳奏不實之處據實嚴參見已降旨將常格馮潮二人解任交軍機大臣會同審訊一經訊有確供卽由驛發交托津等嚴辦托津等當先就提到人證案卷詳細確覈以憑質對又百齡保奏幕友縣丞楊德埧一節據初彭齡稱楊德埧長年在百齡署中幫辦筆墨於河工防禦事宜並未出力等語據百齡稱

該員隨辦軍務晝夜辛勤又因請悉河務復留其在署稽覈工程文案是以兩次保奏會於奏片內切實聲明等語楊德垣是否於防禦河工兩案均屬出力並著托津等就近查明並提奏案覈對據實具奏至江甯各屬是否有續虧六十餘萬陳桂生稟覆初彭齡原稟內稱此項銀兩本未列清查項內見在已經批解支撥者三十餘萬等語果否確實並著托津等查明據實具奏○癸未論托津等奏審擬廖思芳妄擊劉第五一案廖思芳明知並非逆犯有意故陷平民其未過教誘劉第五供認造反及識認林清並一告以林清年歲狀貌係廖思芳指使見已供證確鑿百齡於此等重案不詳慎研鞫率以廖思芳恐嚇教誘供詞冒昧入奏若非部臣平反幾成冤獄百齡不必交部議處著革去官銜及協辦大學士暫留兩江總督之任廖寅失察伊子妄擊教供著交部嚴加

議處已革知縣蔣承紀周以勳承審重案不將傷痕確實相驗又未查出教供情弊著照例開復交部議處○以吏部尙書章煦協辦大學士○增設河南滑縣都司一員○是歲朝鮮琉球來貢○會計天下民穀數各省通共大小男婦三萬一千六百五十七萬四千八百九十五名口各省通共存倉米穀三千八十萬二千八百六十九石九斗一升七合五勺

東華續錄

臣王先謙

周瀚蕃恭校

嘉慶二十年乙亥春正月丁酉諭托津景安奏遵旨查辦初彭齡原參百齡張師誠一案據實查明分別參奏一摺此案前據初彭齡參奏百齡於兼署巡撫時管關道員鍾琦曾經幫貼捐差盤費銀一千二百兩張師誠告假在籍時差弁摺奏及到任後遣人回家一切盤費俱在稅項內動支又張師誠向管關道員劉澐查問關稅劉澐因此送銀二千兩並風聞百齡向有收受永豐壩泰壩委員餽送銀二萬餘兩之事特派托津等馳往清江秉公查辦茲據托津等查明此項巡撫衙門提取兩關銀係相沿陋規由來已久此次百齡署巡撫時曾因蘇屬出差兵丁口食不敷由藩司議

詳在海關提銀一千二百兩揚關提銀八百兩發縣生息以資津貼至張師誠未到任時捐差等項委係自發盤費卽到任後亦未動用稅銀其劉澧解送公費銀二千兩張師誠亦駁斥未收至兩壩解送總督衙門銀兩係奏明批解公費此外百齡並無收受餽送情事是初彭齡原參均係不確初彭齡原奏摺內據稱百齡張師誠節次需索提用銀數係由藩司常格告知經朕派令軍機大臣傳到常格兩次詰訊常格堅稱並無此語昨初彭齡覆奏摺內亦自稱輕率入告陳奏失當不能舉出證據無可置辨等語初彭齡奏事不實咎無可辭著交部嚴加議處伊見在承審銅山縣監生崔雨辰控案審結後卽行來京聽候部議百齡提取兩關稅銀項下發縣生息以資兵丁差費雖係以公濟公惟率據司詳並不奏明辦理究屬不合著交部議處張師誠於捐差等項盤費並未

支用關項其在籍居住時江蘇標弁就近迎至其家張師誠卽應以尙未到任飭令回蘇仍留供差遣亦有不合其過尙輕著改爲交部察議至陳桂生前因督催上忙不力經初彭齡參奏續又効其於所屬虧短庫項掩蓋彌縫職逮問今據托津等查明陳桂生先後詳稟各案並無含混隱匿情弊其所催上忙亦已完報七分有餘陳桂生著來京以從四品京堂補用尋議上得旨吏部具奏議處初彭齡等一摺初彭齡秉性褊急素以糾彈爲能朕屢加訓誡以嫉惡過嚴本屬爲公然輕於舉發不察虛實久之爲人窺測卽有造爲謾菲之詞賤令排擊者在己方以爲持正而不知適爲人所用藉以快其私忿此次所參百齡張師誠各款如果屬實試思伊等當得何罪豈僅視職所能蔽辜乃率以無據游詞飛章入奏殊屬輕躁部議降二級調用實爲咎所應得因伊任內有革

職留任之案議以革任初彭齡尙不至廢棄著加恩照所降之級以內閣學士來京候補餘依議○戊戌諭軍機大臣等百齡等奏據藩司楊毓詳參嘉定寶山奉賢三縣未完下忙錢糧有二萬數千兩一萬數千兩不等請將知縣吳桓姚鳳楷張敏求三員革職並聲稱該三縣均係有漕之處難以驟易生手俱請暫留本任其督催不力之松江府宋如林太倉州朱景昌先行革去頂帶予限督催經該督等查與新定章程不符業經批駁等語官屬民欠情事判然州縣未完之項如係官員虧缺卽當查明嚴參離任著追分別覈辦如係官員虧缺而詭言民欠更應加重治罪以儆貪墨若果係民欠則當於奏銷時按照分數將經徵督催各員分別參處必須區別分明不容淆濶江蘇省查辦虧空甫經議定章程期於法在必行今嘉定等三縣未完銀兩究竟係屬官虧抑係民欠

並未查明籠統參辦如民欠屬實則此時奏銷尙早何遽將三縣先予革職處分若竟係以完作欠侵蝕官帑則此時立法之初既已參奏革職又復藉辦漕爲詞聲請暫留本任是又爲不肖劣員開戀缺之門似嚴實寬通省州縣更復何所儆懼新定章程豈不竟成虛設耶所有嘉定等三縣未完下忙錢糧著該督撫確實查明分別覈辦嗣後惟當恪遵新例實力奉行如有應行參劾之員均不得藉經手要事爲名復請留任以杜掩飾○癸卯以吳璥爲兵部尙書李鴻賓爲河東河道總督由副總河遷○戊申戶部議准四川總督常明奏清溪縣松坪土司馬駱氏並所轄柞木園等處二十八堡夷眾請改土歸流以其地之深溪溝爲界東北牛心山柞木園一帶夷民八百四十三戶歸義邊廳管轄西南松坪上堡下堡一帶夷民九百九十戶歸清溪縣管轄照例納糧該土司仍世

給土千戶職銜從之○己酉諭初彭齡奏茅豫自上年入冬後忽染耳聾病證請回籍調理等語茅豫前在山西河東道任內因參奏陳桂生虛妄降用京職上年隨初彭齡出差嗣初彭齡署江蘇巡撫奏留伊在署辦事當經降旨將茅豫留於江蘇以知府候補此次初彭齡參奏陳桂生失實必係茅豫挾嫌從中懇懇見在初彭齡差竣回京茅豫係江省候補人員卽因病乞假亦應由該督撫題奏乃稟請初彭齡爲之具奏顯係規避茅豫著革職永不敘用初彭齡以非其所屬之人代爲陳請侵占事權殊屬專擅初彭齡再者交部嚴加議處尋議上得旨上年初彭齡奉使廣西茅豫由刑部司員隨往初彭齡差旋復命若茅豫仍係司員尙可隨同回京中部請假茅豫前已奉旨留於江蘇以知府候補卽係外省官員非初彭齡所屬伊稟請給假初彭齡自應移咨該督撫驗明

患病虛實由該督撫照例題奏設有捏病規避情事由該督撫據實劾參方爲正辦乃初彭齡率行入奏並稱一面分咨該督撫辦理實屬專擅初彭齡前經部議革任經朕施恩以內閣學士補用此次復蹈愆尤本應卽予褫革姑念伊由翰林出身尙堪以文學自效著加恩以翰林院侍讀侍講降補○辛亥以陳桂生爲甘肅布政使品候補四京堂○癸丑允廷臣請編御製文二集○是月江蘇巡撫張師誠奏謝得旨此一番舉動皆由茅謙播弄所致總欲陷害陳桂生波及於百齡及汝初彭齡剛愎性成爲所驅使汝不必結怨惟返躬自責勉爲良臣朕未昏耄豈能任小人肆其伎倆乎○浙江巡撫顏檢奏謝得旨汝操守好才幹優所欠者愛積小陰功心慈面軟不能振作是以屬員止知懷德而不畏威吏治弊壞皆由此起猛以濟寬汝其勉之

二月丁巳朔諭本日章煦等奏山東通省州縣虧缺銀新陳共積有六百餘萬兩該省做壞一至於此實堪痛恨此項虧缺皆起於嘉慶元年以後此十餘年來朕並未舉行東巡致勞供頓其該省大吏亦從無貢獻珍玩等物此中外所共知將復何所藉口皆由歷任巡撫藩司曠職玩公縱令不肖州縣將國帑付諸漏卮此內若謂一無賄索其誰信之姑念事屬已往不加深究著軍機大臣查明該省自嘉慶元年起至十九年止巡撫藩司在任年月久暫其業經身故者查明伊子弟有無職官開單具奏候朕酌量分別罰賠以示懲儆尋議請將該省無著銀十七萬八千三百六十餘兩罰令嘉慶元年以後歷任巡撫藩司按照在任月日分賠從之

○戊午 上御經筵○調陳桂生爲江甯布政使楊懋恬爲甘肅布政使慶炆爲陝西布政使以和舜武爲山東布政使調李繼宣

為廣東按察使以戚泰為直隸按察使

由通禾道遷

○辛酉諭軍機大

臣等喜明等奏復接廓爾喀王來稟遵旨嚴行駁飭緣由一摺廓爾喀與披楞互相爭鬪自取敗衄天朝豈能過問乃屢次瀆求賞助金銀並向達賴喇嘛班禪額爾德尼等求為幫助口糧殊為貪詐喜明等遵照諭旨嚴行駁飭所辦甚是其達賴喇嘛班禪額爾德尼於接到廓爾喀來信亦俱能正詞駁斥絕其覬覦之心朕披閱進呈各信底均甚妥協著喜明等檄知以爾國見與披楞打仗一事據爾來稟所言爾國兵丁被披楞損傷固多但爾國殺害披楞之人前後計有八千餘名亦屬不少可見爾國兵勢尙足以抵禦披楞若謂披楞廣有金銀爾國既能殺敗披楞所得財物分給爾國兵丁亦可不至窮苦何得飾詞求助況天朝撫馭外藩從無賞給餉銀令與鄰國構兵之理即如緬甸與暹羅國為天朝屬國

伊兩國從前累有爭戰之事彼時大皇帝從未偏助今爾等彼此
相爭事同一律若此時幫助爾等豈披楞前來求助亦幫助披楞
乎如此明白曉諭該國王自不能再行瀆請至陽布地方關繫緊
要不可不密爲備禦固守藩籬喜明等當督率邊界營汛加意訓
練留心防範並派明幹將弁在彼時常偵探如披楞與廓爾喀止
在邊外構釁總當置之不問儻或披楞之兵竟敢闖入界內侵擾
陽布地方必當示以兵威痛加剿殺立時驅逐出境勿稍疏懈○
甲子慶收緣事降調調陳觀爲陝西布政使以吳邦慶爲山西布
政使由內閣侍讀學士遷○丙寅以海慶爲河南布政使敦良爲安徽按察
使由陝西延綏○戊辰諭乾隆年間會纂輯秘殿珠林石渠寶笈正
續二編所有 列聖宸翰暨古今臣工書畫業經繕寫成書尊藏
秘閣茲查續編成於乾隆癸丑迄今二十三年 皇考聖學淵深

無美不備染翰揮毫收藏內府者又積至于有餘件之多朕自丙辰受璽以來幾暇怡情惟以翰墨爲事閱時既久卷帙亦繁應一併詮次用志歲月至內外臣工祝嘏抒誠所進古今書畫亦復不少允宜遵照前書定例重爲遴選昭示來茲著內廷翰林英和黃鉞姚文田分班至懋勤殿悉心檢閱並添派翰林院侍講學士吳其彥庶子張麟侍讀顧臬洗馬朱方增修撰吳信中龍汝言編修沈維鏞胡敬入人暫停其在館差使逐日隨同繕寫俟辦理完竣後仍回本衙門供職卽於本月二十九日入直朕在宮時翰林等著由乾清門出入遇朕駐園巡幸之日著由內右門出入其一切事宜均查照前例辦理○癸酉諭御史孫汝奏查有虧空州縣應飭離任以杜弊端一摺州縣虧空屢經明降諭旨嗣後該管上司一經查出卽據實參辦照侵盜那移定例革職拏問按限監追治

罪豈僅止於離任見在江蘇山東查辦虧空因其積弊已久展轉接受此時新任官員大率非原虧之人是以另立章程分別責令完繳其中有係新虧之員亦仍照定例參辦未嘗稍從末減致啓玩視至追補舊虧責成該撫藩臬酌調劑各大吏果存心公正自能獎廉黜貪勸懲兼施吏治肅清倉庫亦均收實效不在多立科條動輒窒礙難行毫無裨於實政也○河南睢州二堡隄工合龍○乙亥諭給事中黃中健奏請復禁銅收銅舊例以裕錢法一摺所奏甚屬不知政體國家因時立政期於便民自乾隆初年停止銅禁以來已八十年民間無不稱便而京省各局銅斤亦並無缺額之虞昨歲朕曾降旨停止外省呈進銅鑪火盆以節糜費而裕鼓鑄酌盈劑虛道貴適中至民間日用所需安能以數十年弛禁之物一旦設爲苛令察及錙銖從前永祚楊懌曾節次奏請禁用

銅器皆經戶部議駁今該給事中復請申嚴銅禁並請飭令官民
家內所有黃銅器皿築以三年爲限悉數繳官如逾限不繳者查
出以違例論罪此令一出必致紛紛擾累胥役訛索鄰里控訴訟
案煩滋究於錢法奚裨耶所奏不可行著無庸議○甲申台斐音
卒調慶保爲廣西巡撫以曾煥爲貴州巡撫趙恆珍爲廣東布政
使廉敬爲廣西按察使由直隸口北道遷○調廣慶爲貴州按察使張曜
吉爲浙江按察使

三月丁亥朔 上親耕藉田○庚寅 上啓鑾謁 東陵○免經

過地方額賦十分之三○辛卯榮郡王蘇德克圖賞治喪銀五千兩
予祭葬諡曰恪○壬辰諭晉昌等奏審明已革佐領烏爾圖夥同
賊犯謀殺防禦海甯阿從嚴定擬一摺此案於上年十月內據晉
昌等奏坐卡章京捏稟舞弊等情朕卽以賊犯黃輞有偷砍木植

烏爾圖既係知情其所報海甯阿患病外出不知去向焉知非卡
員等夥同作弊海甯阿一人獨不肯染指致遭戕害與從前王仲
漢謀死李毓昌情事相類當飭該將軍等務查海甯阿實在下落
勿任稍有枉縱續據該將軍等訊出海甯阿於烏爾圖私帶賊犯
曾有欲行稟揭之事烏爾圖到案供詞猶復狡展復經朕降旨將
晉昌等審辦此案失之寬緩嚴行申飭茲據該將軍等訊明烏爾
圖於上年派充坐卡總巡行至殺陽邊門卽商同黃幅有私帶賊
犯樊十等出邊打牲並私挖人獲局邊後坐卡防禦海甯阿屢向
不依又將烏爾圖縱令出邊之黃幅有張得占等拏獲不允贖放
烏爾圖遂與樊十商同誘令海甯阿同赴江邊釣魚乘其不備樊
十點槍將海甯阿立時打斃卓青阿黃幅有幫同擡屍拋棄江中
滅迹其與王仲漢謀害李毓昌一案情節相似體骨漂流更爲慘

酷果不出朕所料可見聽訟必須細心設竟如晉昌等初奏顛預
率結使正兇漏網奇冤莫雪成何事體烏爾圖身係職官夥同賊
犯越邊偷竊業已行同盜賊又因海甯阿持正不依遂商同致斃
樊十本係賊犯手戕職官該二犯情罪重大俱著卽行處斬於行
刑時先行重責四十板樊十並著梟首江干示眾烏爾圖之子不
論幾人俱著發往伊犁以示重懲黃輞有先有剽破海甯阿胸心
之語已有謀害之心卓青阿雖曾將人命事大之言向烏爾圖勸
阻然仍持竿賺海甯阿至江邊釣魚後復幫同棄屍該二犯均屬
同謀加功依律問擬絞監候趕入本年秋審情實其餘罪名著軍
機大臣同行在刑部再行覈議具奏海甯阿以防禦微員於佐領
烏爾圖縱賊出邊屢加阻斥其拏獲黃輞有等之後不肯徇情贖
放烏爾圖分給馬匹又拒不受並備呈欲行控揭守正不阿以

致被害實堪嘉憫海甯阿著加恩照三品參領陣亡例給予卹典並著該將軍查明伊見有幾子或無子嗣並查明兄弟幾人是否有子堪以立繼覆奏到日再行降旨施恩尋奏上得旨海甯阿長子雙英賞給驍騎校○甲午諭百齡等奏覆查茅豫劣蹟並初彭齡各款一摺初彭齡經朕擢用有年內任卿貳外厯封疆宜何如勵精圖報乃於署江蘇巡撫任內沈湎於酒以致辦理稟案親自畫題者五十三件畫行者五十二件其委茅豫代爲畫題者五十七件畫行者五百二十一件巡撫衙門稟案皆係地方刑名錢穀要務何得假手於人朕日理萬幾於臣工奏牘無不親加批答初彭齡輒敢自耽逸豫倩人畫諾然則署理撫篆所署何事上年初彭齡參劾陳桂生續報收銀文冊先後互異一摺係於十月初九日拜發其摺內稱陳桂生並不聲明何員那解含混具報其實陳

桂生已將署溧水縣知縣劉翰周另詳揭參係與緝報收銀文冊同於十月初八日到院業經初彭齡於文面標明日期乃有心隱匿原稟摺內漏不聲敘見據茅豫供稱此件另詳並未給看則初彭齡於此事竟係有意文致陳桂生之罪是誠何心各處欽差督撫奏摺奉有硃批發回應各自祇領拆閱見據茅豫供稱初彭齡與百齡等兩議查辦虧欠章程奏到批回時將百齡等原摺私自拆閱見有不敢昧良孤恩之語遂謂百齡等有心將伊參革發怒臆款將百齡等劾奏至茅豫並未耳聾見據自行供認係屬捏報並稱初彭齡先許代爲告病以上各款實屬改弦易轍任性妄爲初彭齡兩經部議革職初次朕念其平日尙稱敢言且歷官資格較深加恩降爲內閣學士嗣又從寬宥過降爲侍講侍讀茲復查出種種謬妄本應革職發往伊犁以示懲創姑念伊母年已九旬

朕所稔知原欲於今歲伊母生辰加以恩賚初彭齡自罹愆咎不能仰承恩眷實爲不孝若其母因子遠戍晨夕思念或有意外之虞初彭齡雖咎由自取朕心殊爲不忍初彭齡著革職施恩免其發遣令在家閉門思過不准出門若再妄爲定不輕恕著將此旨並百齡等捐與茅諫供詞交曹振鏞英和景安傳到初彭齡令其閱看俾自知罪愆並可知茅諫之爲人初彭齡有何登答著曹振鏞等據實覆奏○吏部議准湖南巡撫廣厚奏永州府屬江華縣之上五堡嶺東二處地方縣亘百餘里距縣城爲遠兼之界連兩粵民獍雜處最易藏奸請將與江華縣同城駐紮之永州府理獍同知移駐濤墟就近督率緝罔巡檢撫綏緝捕從之○丙申上謁 昭西陵 孝陵 孝東陵 景陵 裕陵回鑾○甲辰上幸南苑行圍○戊申 上還京師○己酉諭蔣攸銛等奏酌定查

禁鴉片煙章程請於西洋貨船到澳門時先行查驗並明立賞罰使地方知所懲勸等語鴉片煙一項流毒甚熾多由夷船夾帶而來嗣後西洋貨船至澳門時自應按船查驗杜絕來源至粵省行銷鴉片煙積弊已久地方官皆有失察處分恐伊等瞻顧因循查拏不力嗣後有拏獲鴉片煙之案除查明地方委員等有得規故縱情事應嚴參辦理外其僅止失察者竟當槩行寬免處分至所請獲與販煙斤自二百斤至五千斤以上分別紀錄加級及送部引見並軍民人等拏獲獎賞以及誣良治罪之處俱著照該督等所請行○壬子內閣學士廣泰以讀本錯誤降候補主事○甲寅上臨榮恪郡王邸億園居賜奠

夏四月甲子 皇后行躬桑禮○轉蘇沖阿爲理藩院左侍郎以

成甯爲理藩院右侍郎

由喀什噶爾參贊大臣遷

○丁卯以伊湯安爲內閣學

士由太常寺卿遷○己巳上閱健銳營兵○丙子以蔣祥墀爲左副都

御史由宗人府府丞遷○丁丑諭軍機大臣等百齡等參奏原任常熟縣

知縣黃鶴一摺已降旨將該員革職拏問交百齡審辦矣江省州

縣虧缺繫屬見在痛加整頓其尤甚者自當重辦一二員俾通省

咸知儆惕黃鶴前於江陰常熟兩任內共虧銀至八萬餘兩之多

其丁憂回籍時已在十八年該省清查之後乃於缺交之項全無

措繳或坐擁厚貲在原籍置買房地或爲子弟捐納職官皆當以

侵蝕入己論罪著百齡等於黃鶴解到時嚴加夾訊如訊出以上

各情卽將該革員擬以重辟請旨卽行正法以爲闔省侵食官吏

之戒○戊寅以姚文田爲兵部右侍郎由內閣學士遷○壬午頒御製

官箴二十六章宣示內外臣工○諭常明奏特參辦理輕縱之總

兵及見在籌辦進剿贍對緣由一摺據稱該督因籌剿中贍對一

事行次鎮城接據羅聲皋稟報中噶對番酋洛布七力畏懼兵威
縛獻兇夷朗結七力等十一名該酋央懇上噶對及噶噲阿色各
土司等保伊出見願以土司印信號紙給伊子阿更承襲該酋徒
居於五百里外之噶噲土司地方以當發遣該鎮已允其所請遣
令回巢一面撤退官兵見在兩路官兵均已撤出數程以外土兵
亦皆散而歸巢該督與總兵羅思舉另行酌籌進兵道路相機辦
理等語中噶對番酋洛布七力連歲侵擾各部落並敢拒傷官兵
情罪重大必須勦辦示懲官兵已攻克宗木多山梁進擊河東礪
寨正當乘勝直前揚兵威而寒賊膽乃羅聲皋率聽洛布七力畏
懼兵威虛詞遽准其所請遣令回巢卽一面撤退官兵專擅糊塗
辦理錯謬常明請將羅聲皋革職作爲兵丁未足示儆羅聲皋著
革職拏問交該督嚴審定擬奏明請旨又據奏阜和協都司圖棠

阿前因查辦西甯賊番搶劫之案稟稱行至德爾格忒土司地界該土司帶領頭人在阿隆溝住紮阻止不令前進見在常明親抵該處查知德爾格忒土司調派土兵協同官軍進剿中瞻對備辦牛馬糧食甚多極爲恭順出力訪查前次並無阻攔圖業阿之事該都司因入境後該土司未經連接伺應捏詞妄稟等語撫馭土司番部全在秉公勸懲以服其心若圖業阿之妄稟洩忿止圖快其私意罔顧國事甚屬可惡圖業阿著革職拏問交該督嚴行審訊恐尙有需索不遂騷擾恐嚇情事著卽從重定擬具奏毋稍徇縱○甲申增設雲南騰越鎮馬鹿塘大壩二汛

五月丁亥諭刑部奏審訊知府王樹勳一犯據供前在廣慧寺爲僧時開堂說法曾有官員及舉人生員等數人皈依受戒見任倉場侍郎蔣予蒲亦在受戒之列等語該犯假託佛法聾聵聞從

前破案時辦理輕縱茲經供指確鑿不可不加以懲處蔣予蒲爾時已爲內閣侍讀學士係四品京堂官乃惑於異說受彼五戒實屬有玷官箴何顏出仕蔣予蒲著卽革職此外被惑之人除已故無庸置議外其餘俱應斥革著刑部查明參辦其王樹勳供詞審訊明確著卽按律定擬具奏尋奏擬發往黑龍江充當苦差得旨先在刑部枷號兩箇月再行發遣○庚寅調朱理爲倉場侍郎以彭希濂爲刑部右侍郎由內閣學士遷○辛卯諭嘉慶十四年方澤大祀因乘輿由外西門轉至北門外降輿路稍紆遠改於內西門外降輿並降旨交軍機處存記俟逾五年後提奏再於內西門內酌量降輿處所見屆方澤大祀相距已逾五年恭查乾隆三十五年以後皇考高宗純皇帝聖壽六旬恭祀方澤係於內西門內齋宮前甬道北降輿朕此時春秋五十有六不敢遽行倣照著

太常寺敬謹相度自內西門外至齋宮前甬道北酌定適中之地鋪設椶薦以備降輿繪圖貼說先行具奏至南郊大祀禮宜從

同自本年冬至為始所有降輿處所亦著太常寺敬謹相度適中

處所繪圖貼說具奏○癸巳李鴻賓丁憂以李逢亨為河東河道

總督由直隸永定河道遷○予河東河道總督李鴻賓故母劉氏祭一次賞

銀三百兩治喪○甲午以嚴烺為甘肅布政使周光裕為湖北按

察使由陝西糧道遷○戊戌命開墾吉林所屬拉林雙城子荒地○以毛

謨為內閣學士由詹事遷○庚子以姚祖同為河南布政使由鴻臚寺卿遷○

壬寅以博啓圖陳嵩慶俱為內閣學士博啓圖由副都統陳嵩慶由翰林院侍講學士遷

○甲辰諭軍機大臣等常明等奏官兵攻克藏多山梁及多隆武

馳抵鎭城一摺此次勦辦中瞻對參將曹興邦帶領噶魯及下瞻

對土司頭人等搶占藏多山梁先後殲斃賊番二百餘名生擒阿

甲降錯折力等三十餘名番夷投降者二百餘人又續報投出三百餘戶搶獲刀械牛羊馬匹甚多洛布七力率令餘黨逃入熱籠地方竄匿該督等見已飛飭總兵羅思舉由下哨對如郎橋過河進抵墨口從熱籠後面與曹興邦合力夾攻多隆武已由鑪城起身前往督辦看來洛布七力勢已窮蹙該督等督飭將弁務將洛布七力擒獲凡抗拒官兵者卽分別凌遲斬決其脅從投出者免死發落並傳集番眾將洛布七力等對眾行刑俾番眾觸目儆心咸知震懾此旨到日計已可剋期蒞事常明自應將善後事宜籌辦妥協再回省城○丁未九公主薨追封爲慧愍固倫公主○戊申 上臨西花園慧愍固倫公主殯所賜奠○己酉改河南荆子關協副將歸南陽鎮總兵兼轄歸德營參將隸撫標裁光州汎千總設光州營都司一○甲寅諭張師誠奏遵旨傳詢宋銘據稱前

在京候補道員時曾至廣慧寺與僧人明心相識並無受戒情事
後在蕪湖道任內伊來募化給過銀五十兩嘉慶十七年有知府
王樹勳進京來謁詢知卽係明心遺俗捐官等語宋銘前與僧人
明心往來並無受戒情事尙不至干吏議迨後王樹勳來謁時伊
身任刑貳且刑部職司法紀知係僧人朦捐職官卽應參奏况曾
經犯案枷杖尤爲有玷名器乃匿不舉發實屬有心徇隱宋銘著
交部嚴加議處尋議革職得旨宋銘於王樹勳爲僧時僅與往來
未經受戒與蔣予蒲有閒著降三級調用補官日仍帶革職留任
六月乙卯朔日有食之○丙辰調顧德慶爲兵部左侍郎以帥承
淵爲吏部右侍郎服闋侍郎○戊午以祝慶承爲廣西按察使由直隸
通永道
○戊辰 御製勤政愛民論宣示廷臣○諭朕閱內務府則例
內載雍正四年欽奉 諭旨圓明園奏事八旗及六部都察院內

務府等衙門分爲九日每日一旗一部輪流奏事過值班之日若該旗該部無應奏之事亦著隨班伺候儻有緊要之事許其不論班次啓奏欽此我皇祖世宗憲皇帝勤求治理整飭官聯自是以後圓明園奏事文職衙門輪爲九班武職衙門輪爲十班皇考高宗純皇帝遵行六十餘年朕嗣統二十年以來亦恪遵罔懈誠以我朝家法勤政爲先駐蹕御園與宮內辦事從無一日少閒部院臣僚書思對命旣應在園候值而衙署有應行坐辦之事亦不可僕僕往來致有曠誤分班輪直法至善也惟文職九班內六部各衙門直班之日俱多陳奏事件其鑾儀衛光祿寺直班之日無事可奏殊覺閒曠除武職十班仍照舊例外所有文職九班著減去一班以都察院歸入刑部大理寺合三法司爲第五班以內務府國子監爲第七班理藩院與鑾儀衛光祿寺爲第八班如

此酌量變通則繁簡適均庶無一日曠閒其事繁之部院衙門仍不論班次隨時來圍奏事卽自本月十九日吏部直班之日爲始各照新例按班輪直朕孜孜圖治宵旰不遑惟以克勤自勗本日御製勤政愛民論宣示臣工諸臣務仰體朕意各盡乃心無忝厥職以亮天功以熙庶績朕實有厚望焉○諭昨日朕披閱內務府進呈則例恭載乾隆三十年 皇考高宗純皇帝諭旨內外各衙門題奏事件遇有地名字面理應遵照全寫乃向來章疏止圖省便每將地名節成一字其謬不可枚舉如熱河之但稱爲熱多倫諾爾之但稱爲諾則其尤甚者嗣後凡有地名字面一槩全寫不得競趨簡易致乖體制欽此嗣於嘉慶八年明亮奏烏魯木齊地方事件將下三字節去止稱其地爲烏又經朕降旨訓飭內外各衙門自應一體懍遵乃本日劉銀之等奏懇留投效委員摺內將

順天府節稱爲留順字樣實屬簡率著通諭各衙門凡有陳奏事
件於應載地名字面務遵照定例全行書寫不得任聽幕胥率用
省文致乖敬謹入告之體○己巳諭朕御製勤政愛民論宣示廷
臣以心勤身勤區別誠僞蓋國家簡用大臣或以德舉或以才選
原責以贊襄庶政經國治民非若侍衛羽林庶司小臣但以奔走
爲勞也因思朕駐蹕御園諸臣來園奏事每詢及時刻多於子初
興起自城內趨直究其間夜過早之故則因奏摺膳牌皆須親詣
官同呈遞因而不致稍遲夫人之精神止有此數當亥子之交正
安神休息之時乃以顛倒衣裳亟亟就道雖身勤於外未免心怨
於內因怨生怠轉致因循庶政矣况散直回城已屆午刻再至衙
門辦事以疲憊之心神欲其遇事尋源竟委昭晰靡遺蓋亦難矣
部院各衙門事務動關朝廷之得失民生之利害若不悉心考究

草草晝諾此雖終夜不寢待漏禁門閒談尋常無謂之事於國事
奚裨乎嗣後部院旗營文武各衙門奏摺俱准令司官代遞應遞
膳牌大臣准令筆帖式代遞朕每日召見廷臣本在卯正以後諸
臣俱以卯初到園不至遲誤屏虛文崇實政寬其筋體之勞瘁正
以養其心志之敬誠朕恕以待下推君臣一體之懷恐諸大臣蒙
犯霜露宵寢不遑俾得休養心神任重致遠諸大臣亦當念朕未
明求衣宵旰勤劬孜孜求治務各竭忠殫智爲國爲民能使庶事
不虞黷陟海宇共底乂安是卽諸臣愛君之實效若上以誠感下
不以誠應但懷圖逸之心不畏素餐之誚則威克厥愛愛克厥威
朕固並行不悖也○庚午以故榮恪郡王縣億子奕綰降襲貝勒
○甲戌原任閩浙總督方維甸卒贈太子少保銜命江甯將軍穆
克登布往奠茶酒予祭葬諡勤襄賞其子舉人候補中書傅穆進

士一體殿試並免歷任應賠銀○己卯諭軍機大臣等常明等奏官兵進抵河西力攻賊寨一摺逆酋洛布七力自奔竄河西之後與大頭人巴耳甲結在卻至賊寨率眾固守抗拒官兵總兵羅思舉等督率弁兵擒戮賊番達那太等二百數十名上瞻對頭人格格絨太帶領中瞻對夷人郎卡次力等數人來軍前投誠該提督等准其投誠並傳令各旁寨頭人出見扣留在營飭令呈繳刀槍器械所辦是此時番眾投誠無不准彼之理但夷情多詐山路嶮巖四處皆賊番稠聚我兵深入夷地該夷目等未必不心懷觀望若我兵遠得勝仗彼自畏威助順如大兵稍不得力彼或仍附賊首阻我後路則所關匪細該督等當檄諭各鎮將等加意隄防切不可稍存大意多隆武等應曉諭投降番目令其作為前敵而以我兵繼其後一則以賊攻賊可資其力再則該番目已經與賊接

仗則一離不可復合並可絕其反覆該督等務相機妥辦將洛布
七力迅速擒殲以靖邊圉○辛巳予死事山東曹縣知縣姚國旃
世職